

AKASHVANI (Kolkata)

Regional News Unit

Date : 26-06-24

Desk in Charge :

Time : 7-35 A.M.

Compiling :

Morning /Day /Evening National/ Regional/ General

Opening Announcement – আকাশবাণী / খবর পড়ছি –

বিশেষ বিশেষ খবর –

১) অষ্টাদশ লোকসভার অধ্যক্ষ কে হতে চলেছেন, তা আজ নির্ধারিত হবে।

এই পদে বিরোধী জোটের প্রার্থী নিয়ে কংগ্রেস-তৃণমূল কংগ্রেসের আলোচনার পর তৃণমূলের পক্ষ থেকে আজ দলীয় সাংসদদের কার্যালয়ে হাজিরা দেওয়ার জন্য 'হুইপ' জারি করা হয়েছে।

২/ লোকসভা নির্বাচনের পর রাজ্য মন্ত্রিসভার আজ বৈঠক বসতে চলেছে।

৩/ রাজ্যের চারটি বিধানসভা আসনের উপ নির্বাচনে আজ মনোনয়ন প্রত্যাহারের শেষ দিন। আজ থেকেই মোতামেন হচ্ছে কেন্দ্রীয় বাহিনী।

৪/ ভারত ও বাংলাদেশের সঙ্গে নদীর জলবন্টন নিয়ে কেন্দ্রের সঙ্গে সংঘাত বেধেছে পশ্চিমবঙ্গের।

৫/ কয়লা পাচার কেলেকারিতে CBI আরো তিনজনকে গ্রেপ্তার করেছে।

৬/ নিট নিয়ে দেশ জুড়ে বিতর্কের মধ্যেই কলকাতায় টাকার বিনিময়ে সরকারি মেডিক্যাল কলেজে ভর্তি করে দেওয়ার নামে প্রতারণার অভিযোগে গ্রেপ্তার এক কোচিং সেন্টারের কর্ণধার।

৭/ আজ আন্তর্জাতিক মাদক ও পাচার বিরোধী দিবস। নানা অনুষ্ঠানের মধ্যে দিয়ে দিনটি পালনের কর্মসূচী নেওয়া হয়েছে।

অষ্টাদশ লোকসভার অধ্যক্ষ কে হতে চলেছেন, তা আজ নির্ধারিত হবে। গত বারের লোকসভার অধ্যক্ষ প্রবীণ বিজেপি সাংসদ ওম বিড়লা, এবারেও অধ্যক্ষ পদে এনডিএ-র প্রার্থী হয়েছেন। অন্যদিকে, বিরোধী আই এন ডি আই এ জোট, ৮ বারের কংগ্রেস সাংসদ কে. সুরেশকে অধ্যক্ষ পদপ্রার্থী করেছে।

এর আগে গতকাল ওম বিড়লাকেই অধ্যক্ষ হিসেবে নির্বাচিত করার জন্য সরকার ও বিরোধী পক্ষের দীর্ঘ আলোচনা হয়। কিন্তু তাঁরা কোনো মতৈক্যে পৌঁছতে পারেনি।

এদিকে, অধ্যক্ষ পদে কে সুরেশকে প্রার্থী করা নিয়ে কংগ্রেস তাদের সঙ্গে কোন আলোচনা করেনি বলে তৃণমূল কংগ্রেস সাংসদ অভিষেক ব্যানার্জী গতকাল জানান। সংসদ ভবনের বাইরে সাংবাদিকদের তিনি বলেন, এই সিদ্ধান্ত একতরফা। এরপর অবশ্য কংগ্রেস নেতা রাহুল গান্ধী, অভিষেকের সঙ্গে সংসদ কক্ষে একান্তে কথা বলেন। পরে তৃণমূল কংগ্রেস নেত্রী মমতা ব্যানার্জীর সঙ্গে তাঁর টেলিফোনে প্রায় ২০ মিনিট কথা হয়। তারপরেই অবসান হয় দু'দলের মন কষাকষির। সন্ধ্যায় কংগ্রেস সভাপতি মল্লিকার্জুন খাড়গের বাসভবনে বিরোধীদের বৈঠকে তৃণমূলের তরফে কল্যাণ বন্দ্যোপাধ্যায় ও ডেরেক ও'ব্রায়েন যোগ দেন। সেখানেই রাহুল গান্ধীকে লোকসভার বিরোধী দলনেতা করার সিদ্ধান্ত গ্রহণ করা হয়।

অন্যদিকে, তৃণমূল কংগ্রেসের পক্ষ থেকে আজ দলীয় সাংসদদের বেলা পৌনে বারোটোর মধ্যে দলীয় কার্যালয়ে হাজিরা দেবার জন্য 'হুইপ' জারি করা হয়েছে। সেখানে অধ্যক্ষ নির্বাচনের ব্যাপারে তাদের অবস্থান চূড়ান্ত করা হবে বলে মনে করা হচ্ছে।

লোকসভা নির্বাচনের পরে রাজ্য মন্ত্রিসভার আজ বৈঠক বসতে চলেছে। মুখ্যমন্ত্রী মমতা ব্যানার্জীর পৌরহিত্যে বিকাল তিনটায় নবান্নে এই বৈঠকে উপস্থিত থাকার জন্য মন্ত্রিসভার সব সদস্যদের নির্দেশ দেওয়া হয়েছে।

নির্বাচনী আদর্শ আচরণবিধি জারি থাকায় রাজ্যে যেসব উন্নয়নমূলক প্রকল্পের কাজ আটকে ছিল সেগুলি দ্রুত শুরু করা, কিছু শূন্য পদে নিয়োগ সহ আজকের

বৈঠকে বেশ কয়েকটি গুরুত্বপূর্ণ বিষয় সিদ্ধান্ত নেওয়া হতে পারে। পাশাপাশি সরকারি খাস জমি বেদখল রুখতে রাজ্য সরকার যে কড়া পদক্ষেপ নিচ্ছে মুখ্যমন্ত্রী, মন্ত্রিসভার সদস্যদেরও তা আরো একবার স্পষ্ট করে জানিয়ে দিতে পারেন বলে মনে করা হচ্ছে।

রাজ্যের চারটি বিধানসভা আসনের উপনির্বাচনের জন্য আজ থেকে সংশ্লিষ্ট কেন্দ্রগুলিতে মোতায়েন হতে চলেছে ৫৫ কোম্পানি কেন্দ্রীয় বাহিনী। আজ থেকেই নদিয়ার রানাঘাট দক্ষিণ, উত্তর ২৪ পরগনার বাগদা, কলকাতার মানিকতলা এবং উত্তর দিনাজপুরের রায়গঞ্জএর বিভিন্ন এলাকায় বাহিনী রুট মার্চ করবে, শান্তি শৃঙ্খলা বজায় রাখতে নজরদারি ও চালাবে। ৫৫ কোম্পানির মধ্যে ৪৭ কোম্পানি কেন্দ্রীয় বাহিনী ব্যবহার করা হবে ভোটের কাজে।

উল্লেখ্য, আগামী ১০শই জুলাই এই চার কেন্দ্রে বিধানসভার উপনির্বাচন।

ফল ঘোষণা ১৩ই জুলাই। এর জন্যে মনোনয়ন প্রত্যাহারের সময়সীমা আজ শেষ হচ্ছে।

বরানগর ও ভগবানগোলা বিধানসভা কেন্দ্রের উপ-নির্বাচনে জয়ী দুই তৃণমূল কংগ্রেস প্রার্থী সায়ন্তিকা বন্দ্যোপাধ্যায় এবং রেয়াত হোসেন সরকারকে শপথগ্রহণ – কে এবং কোথায় করাবেন, তা নিয়ে এখনো চূড়ান্ত সিদ্ধান্ত হয়নি। বিধানসভায় এসে তাদের শপথ গ্রহণ করানোর অনুরোধ জানিয়ে, রাজ্যপাল সিভি আনন্দ বোসকে ফের চিঠি দিয়েছেন দুই বিধায়ক। চিঠিতে বলা হয়েছে, আজ বিধানসভায় বেলা ১২-টা থেকে বিকেল ৪-টে পর্যন্ত রাজ্যপালের জন্য অপেক্ষা করবেন তাঁরা। গতকাল বিকেলে নব নির্বাচিত দুই বিধায়ক অধ্যক্ষ বিমান বন্দ্যোপাধ্যায়ের সঙ্গে দেখা করেন।

পরে সাংবাদিকদের অধ্যক্ষ বলেন, রাজ্যপালের উচিত বিধানসভায় এসে দুই বিধায়ককে শপথবাক্য পাঠ করানো।

(বাইট – বিমান বন্দ্যোপাধ্যায়)

জনপ্রিয় বিস্কুট নির্মাতা সংস্থা ব্রিটানিয়া কলকাতা থেকে তাদের ব্যবসা সরিয়ে ভিন রাজ্যে চলে যাচ্ছে বলে যে প্রচার চলছে, তা মিথ্যা এবং উদ্দেশ্যপ্রণোদিত বলে রাজ্য সরকার জানিয়েছে। নবান্নে গতকাল সাংবাদিক বৈঠকে রাজ্যের প্রাক্তন অর্থমন্ত্রী তথা মুখ্যমন্ত্রীর প্রধান অর্থনৈতিক উপদেষ্টা অমিত মিত্র বলেন, সংস্থার এক্সিকিউটিভ ভাইস প্রেসিডেন্ট তথা ম্যানেজিং ডিরেক্টর বরুণ বেরি নিজে চিঠি দিয়ে তাঁকে এ বিষয়ে আশ্বস্ত করেছেন।

অমিত মিত্র জানান, ব্রিটানিয়া পশ্চিমবঙ্গে এক হাজার থেকে ১২০০ কোটি টাকার বিস্কুট উৎপাদন করছে, যা অব্যাহত থাকবে।

(বাইট- অমিত মিত্র)

ভারত ও বাংলাদেশের মধ্যে নদীর জলবন্টন নিয়ে কেন্দ্রের সঙ্গে সংঘাত বেধেছে পশ্চিমবঙ্গের। কেন্দ্রীয় সরকার, মমতা ব্যানার্জীর নেতৃত্বাধীন সরকারের বিরুদ্ধে মিথ্যা দাবির অভিযোগ করে বলেছে, এব্যাপারে বরাবর রাজ্য সরকারকে অবহিত করা হয়েছে। সরকারী সূত্রে বলা হয়েছে, ১৯৯৬ সালে স্বাক্ষরিত ভারত - বাংলাদেশ, গঙ্গার জলবন্টন চুক্তির অভ্যন্তরীণ পর্যালোচনায় রাজ্য সরকারের সঙ্গে কোন পরামর্শ করা হয়নি বলে, পশ্চিমবঙ্গ সরকার যে দাবি করছে, তা অসত্য। গত বছর ২৪-শে জুলাই এসংক্রান্ত কমিটিতে অন্তর্ভুক্তির জন্য পশ্চিমবঙ্গ সরকারের কাছে মনোনীত সদস্য চাওয়া হয়। আগস্টে এই সদস্য হিসেবে রাজ্য সরকার সেচ ও জলপথ নির্দেশালয়ের চিফ ইঞ্জিনিয়ারকে মনোনীত করে। এবছর ৫-ই এপ্রিল পশ্চিমবঙ্গ সরকারের সেচ ও জলপথ দফতরের যুগ্ম সচিব, আগামী ৩০ বছরের জন্য ফারাক্কা ব্যারেজ থেকে জলের মোট দাবির পরিমাণ জানিয়ে দেন।

এর আগে এব্যাপারে প্রধানমন্ত্রী নরেন্দ্র মোদীকে, মুখ্যমন্ত্রী মমতা ব্যানার্জী চিঠি লিখে তাঁর আপত্তির কথা জানিয়ে ছিলেন।

অন্যদিকে, বাংলাদেশের সঙ্গে গঙ্গার জল বন্টন চুক্তির পুনর্নবীকরণ ও পর্যালোচনা রাজ্যকে জানিয়েই করা হয়েছে বলে কেন্দ্রীয় সরকারের দাবি, রাজ্য

সরকার খারিজ করে দিয়েছে। মুখ্যমন্ত্রী মমতা ব্যানার্জীর প্রধান উপদেষ্টা আলাপন বন্দ্যোপাধ্যায় গতকাল নবান্নে জানান, জল বন্টন চুক্তি নিয়ে আলোচনা করতে ২০২৩ সালে জলশক্তি মন্ত্রক ১২ সদস্যের টেকনিক্যাল কমিটি গঠন করে। তাতে পশ্চিমবঙ্গ সরকারের একজন চিফ ইঞ্জিনিয়ারকে রাখা হয়েছিল। গত ১১ই জুন সেই কমিটি কেন্দ্রীয় জল কমিশনকে তাদের রিপোর্ট দেয়।

জুন মাসের শেষ সপ্তাহেও পশ্চিমবঙ্গের বেশিরভাগ জেলা বর্ষার বৃষ্টির অপেক্ষায়। উত্তরবঙ্গের আলিপুরদুয়ার, কোচবিহার, জলপাইগুড়ি, কালিম্পং ও দার্জিলিং বাদে রাজ্যের সর্বত্রই বৃষ্টির ঘাটতি উদ্ভূত।

চলতি মাসে এখনও পর্যন্ত ৬০ থেকে ৯৯ শতাংশ বৃষ্টির ঘাটতি দেখা যাচ্ছে মালদা, মুর্শিদাবাদ, বীরভূম, পূর্ব বর্ধমান, নদীয়া, দুই ২৪ পরগনা, হাওড়া, হুগলী, কলকাতা, পূর্ব মেদিনীপুর, বাঁকুড়া ও পুরুলিয়ায়।

পশ্চিম বর্ধমান, পশ্চিম মেদিনীপুর, ঝাড়গ্রাম ও উত্তর দিনাজপুরে বৃষ্টির ঘাটতি ২০ থেকে ৫৯ শতাংশের মধ্যে।

কয়লা পাচার কাণ্ডে সি বি আই আরো তিনজনকে গ্রেপ্তার করেছে।

এদের মধ্যে আছেন ECL-এর প্রাক্তন জেনারেল ম্যানেজার ও দুই কর্মী।

গতকাল নিজাম প্যালাসে ওই তিনজনকে দীর্ঘ জেরার পর গ্রেপ্তার করা হয়।

উল্লেখ্য, এর আগেও সি বি আই কয়লা পাচার কাণ্ডে আরো তিনজনকে গ্রেপ্তার করে।

নিট নিয়ে দেশ জুড়ে বিতর্কের মধ্যেই টাকার বিনিময়ে সরকারি মেডিক্যাল কলেজে ভর্তি করে দেওয়ার নামে প্রতারণার অভিযোগে কলকাতার একটি কোচিং সেন্টারের কর্ণধার সৌরিশ ঘোষকে পুলিশ গ্রেপ্তার করেছে। সৌরিশ ও আরো কয়েকজন মিলে এক ছাত্রীর বাবার কাছ থেকে নগদ ৫'লক্ষ ও ব্যাঙ্ক মারফত আরো ১১'লক্ষ ৮০ হাজার টাকা নেয় বলে অভিযোগ। তারপর

মেডিক্যাল কলেজে ভর্তির জন্য তার নাম নথিভুক্ত করেছে এমন ভুয়ো কাগজ'ও দেখায়। কিন্তু মেধা তালিকা প্রকাশের পর তার নাম ওঠেনি, টাকাও ফেরত দেওয়া হয়নি। পরে মেয়েটির পরিবারের পক্ষ থেকে শেক্সপীয়ার সরণী থানায় দায়ের করা অভিযোগের ভিত্তিতে সৌরিশকে পুলিশ গ্রেপ্তার করে। তাকে গতকাল আদালতে তলা হলে, ৫'ই জুলাই পর্যন্ত পুলিশী হেফাজতে পাঠানো হয়েছে।

মুর্শিদাবাদ মেডিক্যাল কলেজের এক তরুণ চিকিৎসকের হৃদরোগে মৃত্যুর ঘটনায় শোকের ছায়া নেমে এসেছে। অনির্বাণ দত্ত নামে বছর ৩৭-এর ওই চিকিৎসক সোমবার হৃদরোগে আক্রান্ত হন। গতকাল ওই হাসপাতালেই তাঁর মৃত্যু হয়। চিকিৎসার পাশাপাশি অনির্বাণ গাইয়ে হিসেবেও খ্যাতি অর্জন করেছিলেন। কোভিড অতিমারীর সময় চিকিৎসকের অবদান নিয়ে তাঁর গাওয়া গান সমাজ মাধ্যমেও ভাইরাল হয়।

আজ আন্তর্জাতিক মাদক ও পাচার বিরোধী দিবস। নানা অনুষ্ঠানের মধ্যে দিয়ে দিনটি পালনের কর্মসূচী নেওয়া হয়েছে। মাদকের অপব্যবহার ও পাচারের বিরুদ্ধে, বিভিন্ন ব্যবস্থা গ্রহণের লক্ষ্য নিয়ে ১৯৮৯ সাল থেকে প্রতি বছর ২৬শে জুন এই দিনটি পালন করা হয়ে আসছে।

কলকাতায় এই উপলক্ষ্যে গতকাল এক অনুষ্ঠানে পার্ক সার্কাস সেভেন পয়েন্টে অস্থায়ী নেশা মুক্তি কেন্দ্রের সূচনা করেন রাজ্যের পুর ও নগরোন্নয়ন মন্ত্রী, মেয়র ফিরহাদ হাকিম। কলকাতা পুলিশ উডল্যান্ড হাসপাতাল ও সমাজসেবী সংগঠন প্রাপ্তি ওয়েলফেয়ার সোসাইটির যৌথ উদ্যোগে ওই কেন্দ্রটি গড়ে তোলা হয়েছে। অনুষ্ঠানে মেয়র মাদক সেবনকে বিশ্বজনীন সমস্যা ও সামাজিক ব্যাধি হিসেবে উল্লেখ করে নেশামুক্ত সমাজ গড়ে তোলার লক্ষ্যে সকলকে এগিয়ে আসা আহ্বান জানান। নেশায় আসক্ত মানুষজনকে সমাজের মূল শ্রোতে ফিরিয়ে আনার দায়িত্ব সকলকেই নিতে হবে বলে'ও মেয়র উল্লেখ করেন।

নানা অনুষ্ঠানের মধ্য দিয়ে আজ সাহিত্য সম্মাট বঙ্কিমচন্দ্র চট্টোপাধ্যায়ের ১৮৬-তম জন্মবার্ষিকী উদযাপিত হচ্ছে। সাহিত্যিক, উপন্যাসিক হিসেবে বাংলা গদ্য ও উপন্যাসের বিকাশে বঙ্কিমচন্দ্রের অবদান চিরস্মরণীয়। আদি সাহিত্য পত্রিকা বঙ্গ দর্শনের প্রতিষ্ঠাতা সম্পাদক ছিলেন বঙ্কিমচন্দ্র চট্টোপাধ্যায়।

এই উপলক্ষে পশ্চিমবঙ্গ তথ্য ও সংস্কৃতি দপ্তরের উদ্যোগে আজ বঙ্কিম ভবন গবেষণা কেন্দ্র, কাঁটাল পাড়া, নৈহাটিতে সাহিত্য আলোচনা সভা ও সাংস্কৃতিক অনুষ্ঠানের আয়োজন করা হয়েছে।

গতবারের চ্যাম্পিয়ান মহামেডান স্পোর্টিং, জয় দিয়ে কলকাতা প্রিমিয়ার লিগ শুরু করেছে। যাদবপুরের কিশোরভারতী ক্রীড়াঙ্গণে গতকাল মহামেডান স্পোর্টিং-এর পক্ষে সজল বাগ ও লালতান কিমা দু'টি করে এবং এলব্যান কোলি এবং জেমস সিং একটি করে গোল করেছেন।
